

आकाशवाणी

खबरां -----

1. तेलंगाना च इक औद्योगिक इलाके च कैमिकल फैक्ट्री च अगग लगगने दी घटना च 12 जनें दी मौत, 26 घायला। प्रधानमंत्री सहायता कोष थमां मरोने आहलें दे परोआरें गी 2-2 लक्ख रपे देने दी घोषणा।
2. राष्ट्रपति द्रौपदी मुर्मू होरें आखेआ ऐ जे नमी टेक्नालजी दा इस्तेमाल पशुएं दियां दोआइयां तैयार करने दे क्षेत्र च क्रांतिकारी बदलाव ते सुधार आह्नी सकदा ऐ।
3. प्रधानमंत्री नरेंद्र मोदी होर बुधवारें 5 देशें दे दौरे पर रवाना होआ करदे न।
4. बीजेपी नै तेजस्वी यादव हुंदे उस बयान दी सख्त नुख्ताचीनी कीती ऐ जेहदे च उनें वक्फ कनून गी कूडेदान च सुट्टने दी गल्ल आकखी ऐ।
5. कांग्रेस अध्यक्ष मल्लिकार्जुन खड़गे होरें आखेआ ऐ जे कर्नाटक च मुख्मंत्री बदलने या नेई बदलने बारै फैसला पार्टी आला कमान गै करोग।
6. विदेश मंत्री एस. जयशंकर होर अमरीका दे त्रै दिनें दे दौरे पर जा'रदे न जित्थे ओहू क्वाड मुल्खुओं दे विदेश मंत्रिं दी बैठका च हिस्सा लैडन।
7. 3 जून गी शुरू होआ'रदी अमरनाथें दी यात्रा लेई तैयारियां मकम्मल, सुरक्षा बंदोबस्त निगगर, जम्मू थमां घाडी तगर पूरे यात्रा रस्ते पर अज्ज 'ड्राई रन' कीता गेआ।

## Hydrabad-Blast

तेलंगाना च अज्ज हैदराबाद दे कश संगाररेड्डी च अज्ज इक्क औद्योगिक इकाई च इक बड्डे रिएक्टर विस्फोट च 12 श्रमिकें दी मोत होई गगेई ते 26 होर घाऽल होई गए। एहू घटना औद्योगिक क्षेत्र च इक्क रासायनिक कारखाने च होई। विस्फोट दे कारण भीषण अग्ग नै सिगाची केमिकल्स आहले परिसर गी अपनी चपेट च लेई लैता। तोआई, राष्ट्रपति द्रौपदी मुर्मु होरें फैक्ट्री च अग्ग लगगने दी घटना च मारे गेदे लोकें प्रति संवेदना प्रकट कीती ऐ। सोशल मीडिया पर पोस्ट च राष्ट्रपति होरें आखेआ जे इस घटना करी ओहू बडी मती दुखी ना। उनें घायलें दे तौले नरोए होने दी कामना बी कीती।

<><><><><><>

## PM-Telangana

प्रधानमंत्री नरेन्द्र मोदी होरें तेलंगाना दे संगाररेड्डी च अज्ज अग्ग लगगने आहली घटना च अपने परिजनें गी जान मोहाने आहले लोकें प्रति संवेदना व्यक्त कीती। मोदी होरें प्रधानमंत्री राश्ट्री राहत कोष थमां हादसे च मारे गेदे परिजनें गी 2-2 लक्ख रपे ते दुर्घटना च घाल होए दे लोकें गी 50-50 ज्हार रपे दी सिंधी सहायता राशि देने दी घोषणा कीती। उनें मारे गेदे लोकें दे परिवार आहलें कन्नै हमददीं प्रगट करदे होई घायलें दे तौले नरोए होने दी कामना कीती। राज्य दे श्रम मंत्री विवेक वेकंटस्वामी होरें दस्सेआ ऐ जे धमाके दे कारणें दा पता लाने लेई जांच पडताल शुरू करी दिती गई ऐ। मुखमंत्री रेवंत रेड्डी होरें घायलें गी इलाज च हर मुमकिन मदद देने लेई निर्देश जारी कीते ना। केंद्री कोयला मंत्री जी. किशन रेड्डी होरें बी प्रभावितें गी हर चाल्ली दी मदद ते सहयोग दा यकीन दोआया ऐ।

<><><><><><>

## President

राश्ट्रपति द्रौपदी मुर्मु होरें आखेआ ऐ जे नमी टेक्नालजी दा इस्तेमाल होरनें क्षेत्रें आहला लेखा पशु चिकित्सा दे क्षेत्र च बी कीता जाना लोडचदा जेदे नै इस क्षेत्र दे विकास च क्रांतिकारी बदलाव आंदा जाई सकदा ऐ। अज्ज बरेली भारत पशु चिकित्सा अनुसंधान संस्थान दे 11में दीक्षांत समारोह गी

संबोधित करदे होई उनें आखेआ जे टेकनालजी दे इस्तेमाल कन्नै मुल्ख भरै च पशु चिकित्सा केंद्रें ते अस्पतालें दा सुधार ते सशक्तिकरण होई सकदा ऐ जेदे नै मुल्ख भरै च पशु धन गी नरोआ ते उंदी बेहतर नसल वृद्धि कीती जाई सकदी ऐ। इस मौके राई-बाई मंत्री शिवराज सिंह चौहान बी मौजूद हे।

<><><><><><>

## BJP-Kolkata Rape

भारती जनता पार्टी दा केंद्री दल लॉ कालेज च होए दे बलात्कार दी घटना दी जांच आस्तै कोलकाता पुज्जी गेआ ऐ। एहू दल इस घटना दे बारे च जानकारी इकट्ठी करोग ते पार्टी अध्यक्ष जगत प्रकाश नड्डा होरें गी अपनी रिपोर्ट सौंपग। इस दल च त्रिपुरा दे पूर्व मुख्मन्त्री बिप्लब देव बी शामिल ना। श्री देव होरें आखेआ जे पच्छिम बंगाल च कनून बवस्था पूरी चाल्ली गड़बड़ाई चुकी दी ऐ। उनें आरोप लाया जे आरोपी तृणमूल कांग्रेस कन्नै जुडे देना। तृणमूल शासन च महिलां सुरक्षित नेई ऐना।

<><><><><><>

## Sonowal-Tamilnadu

केन्द्रीय पत्तन, पोत परिवहन ते जलमार्ग मंत्री सर्बानंद सोनोवाल होरें आखेआ ऐ जे केंद्र सरकार नै देश च 5 ज्हार किलोमीटर नौगम्य जलमार्गें गी बवसायिक बनाने दा लक्ष्य रक्खे दा ऐ। एहूदे नै आसियान देशें गी कूज कन्नै जोड़ना सखल्ला होग। पैहले एशियाई भारत कूज संवाद दे उद्घाटन च उनें आखेआ जे सरकार दी सागरमाला पहल 2029 तगर 10 लक्ख यात्रियें दा लक्ष्य रक्खदी ऐ। उनें गलाया जे 2013-14 च कूज शिप थमां यात्रा करने आहले यात्रियें दी गिनतरी 102 ही जेड़ी हून बढियै 14 ज्हार 272 होई गेदी ऐ। श्री सोनोवाल होरें आखेआ जे प्रधानमंत्री मोदी होरें आक्खे दा ऐ जे देश दे तटें पर संपर्क बढाने ते सीमा शुल्क गी सक्षम बनाने आस्तै सार्वजनिक निजी भागीदारी गी सक्षम करने दा एहू उचित समें ऐ। उनें आखेआ जे कूज पर्यटन आधुनिक विश्व च प्राचीन संस्कृति गी पुनर्जीवित करने आस्ते इक्क आशाजनक मौका प्रदान करदा ऐ।

<><><><><><>

## 5 National Tour

प्रधानमंत्री नरेन्द्र मोदी होर बुधवारें 5एं गी घाना, त्रिनिदाद टोबैगो, अर्जेटीना, ब्राजील ते नामीबिया दी जात्तरा पर रवाना होडन। विदेश मंत्रालय च आर्थिक सरबंधें बारै सचिव दम्मू रवि होरें अज्ज नई दिल्ली च दस्सेआ जे प्रधानमंत्री होर अगले महीने दी 2 थमां 3 तरीख तगर अपनी 5एं देशें दी जात्तरा दे पैहले चरण च घाना दी जात्तरा करडन। एह घाना दी उंदी पैहली जात्तरा होग। उनें आखेआ जे मोदी घाना दे राष्ट्रपति हुंदे कन्नै गल्लबात करडन। दोनं देश मजबूत आपसी सांझेदारी दी समीक्षा करडन ते आर्थिक, ऊर्जा ते रक्षा सहयोग दे क्षेत्रें च नमिणं संभावनाएं पर चर्चा करडन।

<><><><><><>

## Karnatka-CM

कांग्रेस अध्यक्ष मल्लिकार्जुन खड्गे होरें आखेआ ऐ जे कर्नाटक च मुखमंत्री बदलने दा फैसला पार्टी आला कमान गै करोग। अज्ज बैंगलुरु च मीडिया दे सोआलै दा परता दिंदे होई उनें इयां आखेआ। तोआई मेसूर हवाई अड्डे पर मीडिया सामने उपमुखमंत्री डी.के शिवकुमार हुंदे कन्नै हत्थ उप्पर चुक्कियै एकता दा मजायरा कीता ते इस बारै जवाब देने सवा नां कीती जे राज्य दा मुखमंत्री बदलेआ जाग की नेई।

<><><><><><>

## EAM

विदेश मंत्री डॉ. एस.जयशंकर अज्जै थमां त्रऊं दिनें दी अधिकारिक यात्रा पर अमरीका जा करदे ना। ओहू उत्थूं दे विदेश मंत्री मार्को रूबियो हुंदं साद्दे पर कल लगने आली क्वाड मुखें दे विदेश मंत्रिणं दी बैठक च हिस्सा लेंगन। विदेश मंत्रालय नै आखेआ ऐ जे क्वाड ग्रुप स्वतंत्र ते खुले “हिंद प्रशांत” क्षेत्र लेई इक सांझे नजरियै गी अगडे बधाने दे नमें प्रस्तावें पर ध्यान दिंदे होई विचार बंटादरा करगंन। ध्यानजोग ऐ जे इस बैठक च आतंकी गतिविधिणं दे दुनिया च तबाही मचाने आले असर दे कन्नो कन्नी

इस समस्या कन्ने निबड़ने दे तौर तरीके पर बी गल्लबात होग, टकोहदा करिसै पहलगाम दी पछोकड़ै च। डॉ. जयशंकर होर न्यूयार्क च संयुक्त राष्ट्र मुख्यालय च “इ ह्यूमन कॉस्ट ऑफ टेरिज़म” विशय पर इक नमैश दा बी उद्घाटन करगंन।

<><><><><><>

### CM-SKICC Meet

मुख्यमंत्री उमर अब्दुल्ला होरें श्रीनगर स्थित शेर-ए-कश्मीर अंतरराष्ट्री कन्वेंशन सेंट च अंतरराष्ट्री विक्रेता खरीदार कार्जक्रम दा उद्घाटन कीता। एहदे च हिस्सा लैने मगरा मुख्यमंत्री होरें आखेआ जे इयै जनेह कार्जक्रम कारोबार गी बढ़ावा देने ते मकामी उद्योग गी होर निखारने च महत्वै आहले हुंदे ना। एस.के.आई.सी.सी च मीडिया कर्मिं कन्नै गल्ल करदे होई मुख्यमंत्री होरें आखेआ जे एहदा असर औने आहले बरें च दिक्खने गी लब्बोग। उनें आखेआ जे इयै जनेह छड़े इक कार्जक्रम कन्नै मता किश नेई होग पर एहू खरी शुरूआत ऐ। उनें आखेआ जे इयै नेह घट्टोघट्ट 6 कार्जक्रम करोआए जाने लोड़चदें मुख्यमंत्री होरें आखेआ जे मुकामी उत्पादकें, विक्रेताएं ते मुख्य भरै थवां खरीदारें बश्कार नियमित तौर पर गल्लबात होनी लोड़चदी तां जे जम्मू-कश्मीर दे उत्पादें जिआं दस्तकारी, फल ते होर दुए उत्पादें गी बढ़ावा थहोई सकै।

<><><><><><>

### Dry-Run Banihal

औंदी श्री अमरनाथ जी दी यात्रा दी तैयारिं दा जायजा लैने लेई जम्मू दे डिविजनल कमिशनर रमेश कुमार ते आई.जी.पी जम्मू भीम सेन तूती होरें जम्मू-श्रीनगर राश्ट्रीय जरनैली शिड़क पर बनिहाल थाहर ड्राई रन करिए अजमैश कीती। डिविजनल कमिशनर होरें चंद्रकोट स्थित लंगर आहली थाहर दा दौरा बी लाया। उनें साफ-सफाई, खाने, मेडिकल सुविधा ते ट्रैफिक प्रबंधन दा जायजा लैता।

<><><><><><>

## LG-Baltal

औंदी श्री अमरनाथ जी दी जात्तरा गी सुरक्षित ते बवस्था आहले ढंगै सिर करोआने लेई उपराज्यपाल मनोज सिन्हा होरें बालटाल आहले आधार शिविर दा दौरा लाया। उनें सुरक्षा बंदोबस्तें दा जायजा लैता। इस मौके पर सुरक्षा ते सिविल प्रशासन दे वरिष्ठ अधिकारी उन्दे कन्नै मौजूद हे। दौरे दौरान उपराज्यपाल होरें जमीनी सतह पर कीते गेदे इंतजामें दा जायजा लैता ते तैयारिएं दा आंकलन कीता। मगरा मीडिया आहलें कन्नै गल्ल करदे होई एल.जी होरें आखेआ जे उनेंगी पूरा भरोसा ऐ जे इस बरे दी यात्रा पिछले बरे थवां बी खरी होगा।

<><><><><><>

## Token-Amarnath

श्री अमरनाथ जी दी जात्तरा दे मद्देनज़र सब्भनें लोड़चदी तैयारिएं गी जोरें-शोरें मुक्कदा रूप दित्ता जा 'रदा ऐ। जम्मू रेलवे स्टेशन दे नेडे स्थित सरस्वती धाम च अज्ज बहुल थमां श्रद्धालुएं गी बशेश काउंटर दे राहें टोकन बंडु जा'रदे न। जम्मू साउथ दे एसडीएम मनु हन्सा होरें दस्सेआ ऐ जे छड़ा इस्सै केन्द्र परा गै श्रद्धालु टोकन हासल करी सकदे न। तोआई श्री अमरनाथ जी दी जात्तरा लेई ऑफलाईन पंजीकरण दा कम्म कल्लै थमां त्रै केन्द्रें - वैष्णवी धाम, पंचैत भवन ते महाजन सभा च शुरु होगा। प्रशासन नै सब्भनें श्रद्धालुएं गी गुजारिश कीती ऐ जे ओहू सब्भै लोड़चदे दस्तावेज अपने कन्नै रक्खन ते सुरक्षित ते बवस्थित जात्तरा लेई पंजीकरण सरबंधी नियमें दी पालमा जकीनी बनान।

<><><><><><>

## Jammu-Police Security

औंदी श्री अमरनाथ जी दी सलाना जात्तरा लेई अपनी तैयारिएं गी तगड़ा करदे होई जम्मू पुलसै, नीम फौजी बलें दे तालमेल कन्नै बक्ख-बक्ख महत्वपूर्ण थाहें पर सांझे नाके स्थापित करदे होई सुरक्षा

सरबंधी हीलें गी होर बधाई दित्ता ऐ। राश्ट्री जरनैली सिडक सने शैहा दे बाहले इलाकें ते भगवती नगर आधार शिविर बक्खी जाने आहले सिडकें सने होरनें संवेदनशील इलाकें च 24 घंटे कम्म करने आहली जांच चौकियां स्थापित कीतीआं गेइयां न। इस पैहलकदमी दा मकसद श्री अमरनाथ जी दी जातरा गी सुरक्षित ते बवस्थित बनाना ऐ। जम्मू पुलस दे सीनियर ऐहलकार, निजी तौर उप्पर निगरानी करै करदे न ते बड़ी मती सतर्कता ते सार्वजनिक सुरक्षा जकीनी बनाने बक्खी ध्यान केन्द्रित कीता जा'रदा ऐ।

<><><><><><>

## Weather

अज्ज झारखंड दे कई क्षेत्रें च मूसलाधार बरखा बरै करदी ऐ। बिहार, छत्तीसगढ, पूर्वी मध्य प्रदेश, हरियाणा, चंडीगढ, दिल्ली, हिमाचल प्रदेश, ओडिशा, पंजाब, उत्तर प्रदेश, उत्तराखंड ते विदर्भ च अज्ज तेज बरखा पेई। विभाग नै अगले सत्तें दिनें दरान कोंकण, मध्य महाराष्ट्र दे घाट आहले क्षेत्रें, गोवा ते गुजरात च मूसलाधार बरखा बरने दी मेद दस्सी ऐ। दिल्ली च अज्ज दरम्याने दर्जे दी बरखा पेई। तोआई, दो दिनें थमां लगातार होआ'रदी मूसलाधार बरखा कन्नै हिमाचल प्रदेश च जनजीवन बुरी चाल्ली अस्त-व्यस्त होई गेदा ऐ। राज्य च बक्ख-बक्ख हिस्सें च भूस्खलन, इमारतां डिगने ते नदियें ते नालें च पानी दा स्तर बदने दी घटनां लगातार सामने आवा करदियां न। प्रशासन नै लोकें गी सौहगा रौहने दी अपील कीती ऐ। तेज बारिश ते पस्सियां पौने दे खतरे गी दिखदे होई हिमाचल प्रदेश दे 4 जिलें च अज्ज सब्बै शैक्षणिक संस्थानें च छुट्टी घोषित कीती गेदी ही। ल्हास पस्सियां पौने करी 129 सडकें पर यातायात ठप होई गेदा ऐ ते 600 थमां बद्द बिजली दे ट्रांसफार्मर कम्म नेई करा'रदे न। मौसम विभाग नै राज्य च 6 जुलाई तगर मूसलाधार बरखा जारी रौहने दी पेशनगोई कीती ऐ।

<><><><><><>